



Recomendación dirixida á Consellería de Cultura, Educación e Ordenación Universitaria para que adopte as medidas adecuadas para garantir a igualdade entre o alumnado dos centros adscritos e o alumnado dos centros de adscrición cando impartan etapas diferentes, no que atinxe á admisión dos recursos educativos complementarios

Expediente: D.3.Q/12595/16

Santiago de Compostela, 20 de marzo de 2017

Sr. conselleiro:

Nesta institución iniciouse expediente de queixa como consecuencia do escrito de ██████ en calidade de presidenta da ██████

ANTECEDENTES

No seu escrito, esencialmente, indicábanos que o alumnado da escola de educación infantil de Os Ánxeles non ten no seu centro de adscrición, o CEIP Pedrouzos, ningunha prioridade na adxudicación das prazas de comedor.

Ante iso requirimos informe a esa Consellería, que xa nola remitiu. Coa información aportada resulta que, en efecto, a competencia na selección e admisión do alumnado comensal correspóndelle ao Consello Escolar do CEIP de Pedrouzos que, de conformidade co procedemento establecido no seu protocolo propio de funcionamento do comedor escolar, aplicará a orde de preferencia recollida na Orde do 21 de febreiro de 2007, que sinala en primeiro lugar ao alumnado usuario do servizo de comedor no curso escolar anterior, agás que variase substancialmente o criterio polo cal foi admitido. Fronte á listaxe provisional de seleccionados para o comedor publicada pola dirección do centro poderase presentar alegacións ante o Consello Escolar do CEIP de Pedrouzos e contra as decisións de dito órgano plasmadas na listaxe definitiva de admitidos poderá presentarse un recurso de alzada ante o titular da Xefatura Territorial da Consellería de Cultura, Educación e Ordenación Universitaria na Coruña.

Ante iso, solicitamos información complementaria á consellería posto que do informe dedúcese que, en efecto, existiría unha prioridade do alumnado que cursou a educación infantil no propio CEIP de Pedrouzos e que foron usuarios do servizo de comedor no curso escolar anterior. O alumnado procedente da EEI Os Anxeles, malia ser un centro adscrito, non tería, a estes efectos, a consideración de alumnado dun único centro, o CEIP Pedrouzos.

Malia isto, o artigo 8 da Orde do 12 de marzo de 2013 pola que se desenvolve o procedemento para a admisión do alumnado en centros docentes sustentados con fondos públicos que impartan ensinanzas de 2º ciclo de educación infantil, de educación primaria, de educación secundaria obrigatoria e de bacharelato reguladas na Lei orgánica 2/2006, do 3 de maio, de educación, sobre a adscrición de centros docentes, declara que a persoa titular da xefatura territorial acordará a adscrición dos centros docentes públicos, oídos os consellos escolares municipais e a xunta provincial de directoras/es, e logo do informe da inspección educativa, de acordo co establecido no artigo 6.1 do Decreto 254/2012, do 13 de decembro.

Os centros públicos adscritos a outros centros públicos que impartan etapas diferentes, consideraranse centros únicos para os efectos da aplicación dos criterios de admisión do alumnado. Xa que logo, se seguiría o mesmo criterio aos efectos do acceso aos servizos complementarios.

A Consellería de Cultura, Educación e Ordenación Universitaria achegou o informe complementario no que indica que no eido dos recursos educativos complementarios non existe prescrición ningunha na actualidade que determine que o alumnado procedente dun centro de ensino adscrito teña o mesmo status respecto da adxudicación de prazas do comedor escolar no centro ao que accede que o alumnado xa escolarizado nel e que foi usuario do seu comedor escolar no curso anterior.

Efectivamente, a normativa actual de comedores escolares deixa discrecionalmente nas mans dos consellos escolares a avaliación e valoración desta casuística, sen prexuízo de que se poidan explorar as mellores vías de comunicación para recomendarlles aos consellos escolares que a teñan en conta nos vindeiros cursos escolares

ANÁLISE

Á vista do contido do escrito de queixa, da documentación achegada pola persoa que promoveu este expediente e do que se manifesta no informe da administración, cómpre facer as seguintes consideracións:

Entendemos que a consellería comparte a posición desta institución sobre a necesidade de garantir unha efectiva igualdade do alumnado dun centro adscrito que imparte só a etapa de infantil no acceso aos servizos complementarios do centro de adscrición, posto que a normativa salienta que consideraranse un único centro para os efectos da aplicación dos criterios de admisión do alumnado.

Esta previsión legal quedaría sen efecto se o Consello Escolar non considerase de xeito idéntico a condición do alumnado usuario do servizo de comedor no curso escolar anterior no CEIP Pedrouzos coa do alumnado provinte da escola de educación infantil de Os Ánxeles. Como é lóxico, esta equiparación non garante o acceso a unha praza no comedor para todo o alumnado no caso de que a demanda sexa superior á oferta. O suposto sería idéntico ao que está regulado na Orde de 12 de marzo de 2013, nos artigos 10, 11 e, especialmente no artigo 12, non modificada neste punto pola Orde do 25 de xaneiro de 2017. Estes preceptos contemplan a idéntica condición do alumnado dun centro de adscrición ao do centro adscrito e a necesidade de aplicar criterios de baremación cando a demanda sexa superior á oferta.

Sendo certo que o Consello Escolar é o órgano con competencia na selección e admisión do alumnado comensal, tamén é certo que tal admisión faise de xeito regulado, en atención a criterios normativos. Neste intre, por non terse publicado aínda a normativa de desenvolvemento do Decreto 132/2013, do 1 de agosto, polo que se regulan os comedores escolares, a orde de preferencia se contén, en todo o que non se lle opoña, na Orde do 21 de febreiro de 2007, reguladora da organización, funcionamento e xestión do servizo de comedor escolar nos centros docentes públicos non universitarios dependentes da Consellería de Educación e Ordenación Universitaria (Diario Oficial de Galicia núm. 45, do 5/03/2016).

No seu artigo 7.5, esta orde prescribe que "a selección e admisión de usuarios do servizo de comedor, cando existan máis solicitudes que prazas dispoñibles, correspóndelle ao consello escolar do centro, tendo en conta o número de prazas de comedor que precise para o persoal de atención ao alumnado. No taboleiro de anuncios expoñerá a listaxe provisoria de admitidos e de suplentes, respectando estritamente a seguinte orde de preferencia. A cuestión é que esta orde de preferencia non contempla ao alumnado que se incorpora desde un centro adscrito.

Tendo en conta que esta orde de preferencia debe respectarse estritamente, é recomendable que a Consellería de Cultura, Educación e Ordenación Universitaria dé instrucións aos Consellos Escolares para respectar tamén a configuración de centro único que teñen os centros adscritos en relación co centro de adscrición.

CONCLUSIÓN

Por todo o sinalado ata agora considerase necesario, en aplicación do disposto no artigo 32.1 da Lei 6/1984, do 5 de xuño, do Valedor do Pobo, facer chegar a esa consellería a seguinte recomendación:

Que a Consellería de Cultura, Educación e Ordenación Universitaria adopte as medidas adecuadas para garantir a igualdade entre o alumnado dos centros adscritos e o alumnado dos centros de adscrición cando impartan etapas diferentes, e que se dea aos Consellos Escolares as instrucións precisas para garantir esta igualdade na selección e admisión de usuarios do servizo de comedor cando existan máis solicitudes que prazas dispoñibles, por ter ambos os dous centros a consideración de centro único a tódolos efectos.

Agradézolle de antemán a acollida ao manifestado nesta resolución do Valedor do Pobo, e recórdolle a necesidade de que no prazo dun mes (art. 32.2), dea conta a esta Institución da aceptación da recomendación formulada, de ser o caso, e das medidas adoptadas para darlle efectividade, tamén se é o caso.

Ademais, facémolle saber que, en aplicación do principio de transparencia, a partir da semana seguinte á data na que se ditou a presente resolución, esta incluírase na páxina web da institución.

O principio de publicidade das resolucións desta institución refórzase no artigo 37 da Lei 6/1984, cando prevé que o Valedor do Pobo, no seu informe anual ao Parlamento de Galicia, dará conta do número e tipos de queixa presentadas; daquelas que foron rexeitadas e as súas causas, así como das que foron obxecto de investigación e o seu resultado, con especificación das suxestións ou recomendacións admitidas pola administración pública galega.

Saúdoo atentamente.

Milagros María Otero Parga
Valedora do Pobo